

**Siunnersuut uunga: Eqqumiitsuliornermik ingerlatsineq pillugu Inatsisartut inatsisaat nr. xx xx. xx 2015-imeersoq**

**Kapitali 1**

*Atuuffia*

§ 1. Eqqumiitsuliornermik ingerlatsinermit ilaapput eqqumiitsulioriaatsit makku iluanni ingerlatat:

- 1) Illussanik titartaaneq.
- 2) Assilissanik eqqumiitsuliorneq.
- 3) Filmiliorneq.
- 4) Assassukkanik eqqumiitsuliat ilusilersuinerlu.
- 5) Atuakkiorneq.
- 6) Niperlersorneq.
- 7) Isiginnaartitsineq.

*Imm. 2.* Eqqumiitsuliornermik ingerlatsinermit ilaapputaaq eqqumiitsulioriaatsit allat iluanni ingerlassat eqqumiitsulioriaatsinut taaneqartunut sanilliunneqarsinnaasut.

*Imm. 3.* Eqqumiitsulioriaatsinut illussanik titartaanermit aamma assassukkanik eqqumiitsulianut ilusilersuinernullu atatillugu taamaallaat pineqartut eqqumiitsuliornermit sammisortai pineqarput.

*Imm. 4.* Eqqumiitsulioriaatsimut assilissanik eqqumiitsuliornermit atatillugu pineqarput assilissanik qalipaanerup, grafikkip, titartaanerup, mixed mediap, ikkussuinerup (installation), qiperuinerup videoliornerullu iluanni eqqumiitsulioriaatsit.

*Imm. 5.* Eqqumiitsulioriaatsimut filmiliornermit atatillugu pineqarput filmiliat suulluunniit qanoq immiunneqarnerat saqqummersinneqarnerallu apeqqutaatinnagit, taakkununga ilanngullugit filmit assineersut videogrammillu, TV-kut aallakaatitat pinnagit.

*Imm. 6.* Eqqumiitsulioriaatsimut atuakkiornermit atatillugu pineqarput atuakkat taallalluunniit tusarnersuliat, taallatut pinnagu allatat, taallat misigissutsinut tunngasut, isiginnaagassiat pissanganartuliat, meeqqanut inuusuttunullu atuakkiat aamma atuakkiat nalinginnaasumik kulturimut tunngasut suliamullu tunngatillugu atuakkiat.

*Imm. 7.* Eqqumiitsulioriaatsimut nipilersornermit atatillugu pineqarput aqqissuussamik nipikkut pilersitat erinarsorneqartut imaluunniit nipilersuummik saqqummiunneqartut. Nipilersugassiorneq (nipilersugassanik pilersitsineq) nipilersornermit tunngasunut ilaatinneqassaaq.

*Imm. 8.* Eqqumiitsulioriaatsimut isiginnaartitsinermit atatillugu pineqarput isiginnaartitsinikkut ingerlatsinerit tassaasut isiginnaartitsineq, opera, ballet, qitik, performance allatigullu eqqumiitsuliorluni isiginnaartunut saqqummiinerit.

**Kapitali 2**

*Akisussaaffiit suliaassallu agguaannerat*

§ 2. Naalackersuisut Kalaallit Nunaanni eqqumiitsuliornermik ingerlatsineq aamma kalaallit eqqumiitsuliaat nunani allani siuarsassavaat, sapinngisamillu innuttaasut annertuumik tamatigoortumillu kalaallit eqqumiitsuliaannut nunanillu allanit eqqumiitsuliornikkut ingerlatanut periarfissaqarnissaat qularnaassallugu.

*Imm. 2.* Kalaallit eqqumiitsuliaattut isigineqarput suliat eqqumiitsuliortunit kalaallinit suliarineqarsimasut imaluunniit eqqumiitsuliornermik ingerlatsineq eqqumiitsuliortunit kalaallinit ingerlanneqartoq.

*Imm. 3.* Eqqumiitsuliortutut kalaallisut isigineqarput, eqqumiitsuliortut Kalaallit Nunaanni aalajangersimasumik najugallit.

§ 3. Naalackersuisut Inatsisartut inatsisaat manna naapertorlugu pisussaaffitik maleruarumallugit, eqqumiitsuliornikkut ingerlatsinerumut tamatumalu saqqummiunnissaanut aningaasatigut tapiissuteqartassapput, tak. §§ 8-11.

*Imm. 2.* Naalackersuisut Inatsisartut inatsisaat manna naapertorlugu pisussaaffitik maleruarumallugit aammattaq:

- 1) init sinaakktissallu timitallit allat pissarsiarinissaannut peqataasinnaapput, tak. §§ 6-7,
- 2) init sinaakktissallu timitallit atugassannngortissinnaavaat, tak. §§ 6-7,
- 3) suliamut atatillugu siunnersuisartoqartitsinnaapput, aamma
- 4) ilinniarnissat, ingerlaqqilluni ilinniarnissat ilinniaqqinnissallu naapertuuttut neqeroorutigisinnaavaat.

§ 4. Kommunalbestyrelsip kommunimi eqqumiitsuliornermik ingerlatsineq siuarsassavaa, sapinngisamillu innuttaasut annertuumik tamatigoortumillu kalaallit eqqumiitsuliaannut nunanillu allanit eqqumiitsuliornikkut ingerlatanut periarfissaqarnissaat qularnaassallugu.

§ 5. Kommunalbestyrelsip Inatsisartut inatsisaat manna naapertorlugu pisussaaffini maleruarumallugit, init sinaakktissallu tigussaasut allat atugassannngortissavai, aamma init sinaakktissallu tigussaasut allat naapertuuttut pissarsiarinissaat peqataaffigisinnaavaa tak. §§ 6-7.

*Imm. 2.* Kommunalbestyrelsi Inatsisartut inatsisaat manna naapertorlugu pisussaaffini maleruarumallugit aammattaq aningaasatigut tapiissuteqarsinnaavoq allatullu iliorluni eqqumiitsuliornikkut ingerlatsinerup isumaginissaa saqqummiunnissaalu kaammattuiffigalugu, tak. §§ 8-11.

### **Kapitali 3**

#### *Ingerlatsineq tapiiffigineqarsinnaasoq tapeeriaatsillu*

#### *Sinaakktissat tigussaasut*

§ 6. Naalackersuisut aamma kommunalbestyrelsi illut, init sinaakktissallu tigussaasut allat eqqumiitsuliornermik ingerlatsinerumut imaluunniit eqqumiitsuliornermik ingerlatsinerup saqqummiunnissaanut atorpeqartut sanaartornerinut, nutarternerinut ingerlannerinullu

tapiissuteqarsinnaapput, tamatumunnga ilanngullugit init saqqummersitsiviit, filmertarfiit, isiginnaartitsisarfiit, init sungiusarfiit aamma ataatsimiittarfiit katersortarfiillu.

*Imm. 2.* Kommunalbestyrelsi allalluunniit illut, init sinaakktissallu tigussaasut allat eqqumiitsuliornermik ingerlatsinermut imaluunniit eqqumiitsuliornermik ingerlatsinerup saqqummiunnissaanut atorneqartut sanaartornerinut, nutarternerinut ingerlannerinullu tapiissuteqarsimappata, Naalakkersuisut tapiissutit tamakkiisumik ilaannakortumilluunniit utertissinnaavaat.

**§ 7.** Illut, init sinaakktissallu tigussaasut allat eqqumiitsuliornermik ingerlatsinermut imaluunniit eqqumiitsuliornermik ingerlatsinerup saqqummiunnissaanut atorneqartut sanaartornerinut, nutarternerinut ingerlannerinullu tapiisarneq pillugu Naalakkersuisut kommunalbestyrelsi isumasiorlugu malittarisassanik aalajangersaasinnaapput, tamatumunnga ilanngullugit akisussaaffiit suliaassallu agguaannerat, tapiinissamut piumasaqaatit atugassarititaasullu, qinnuteqarnermi periusissat, naatsorsuutit kukkuneruinerlu.

#### *Eqqumiitsuliornermik ingerlatsineq tamatumalu saqqummiunnera*

**§ 8.** Naalakkersuisut aamma kommunalbestyrelsi makkununnga tapiisinnaapput:

- 1) eqqumiitsuliornermik ingerlatsinerup ingerlanneranut, tamatumunnga ilanngullugit angalanernut aningaasartuutit matussusernissaannut aamma ineqarnermut aningaasartuutitut,
- 2) eqqumiitsuliorluni suliat inerisarnerinut suliarinerinullu, tamatumunnga ilanngullugit eqqumiitsuliornermik ingerlatsinermut atortussat aamma
- 3) eqqumiitsuliornermik ingerlatat saqqummersinnissaannut siammaannissaannullu.

*Imm. 2.* Imm. 1 naapertorlugu tapiissutit, tapiissutit tigunissaannut piumasaqaatit piviusunngortinneqarpata tapiisoqarumaarneranik qularnaveeqqusiinertut tunniunneqarsinnaapput.

*Imm. 3.* Naalakkersuisut eqqumiitsuliornermik ingerlatsinermut saqqummiinermullu tapiinissamut malittarisassanik aalajangersaasapput, tamatumunnga ilanngullugit tapiiffigineqarsinnaasut killilersornerat, tulleriiaarinissamut piumasaqaatit, tapiissutit suussusii annertussusiilu, tapiinissamut piumasaqaatit, tapiinermi atugassarititat, qinnuteqaatinut piumasaqaatit, periusissat, allaffissornikkut aqutsineq aamma naammagittaalliorneq.

**§ 9.** Naalakkersuisut aamma kommunalbestyrelsi kalaallit eqqumiitsuliaannik pisiortorsinnaapput, takussutissatut katersugaateqalernissaq siunertaralugu aamma inissaq tamanit tikinneqartoq pinnersarumallugu.

*Imm. 2.* Naalakkersuisut kalaallit eqqumiitsuliaannik pisiortornissaq pillugu malittarisassanik aalajangersaasinnaapput, tamatumunnga ilanngullugit agguaassineq, piginnittuunermet tunngasut aserfallatsaaliinerlu.

**§ 10.** Naalakkersuisut aamma kommunalbestyrelsi inissap tamanit tikinneqartartup pinnersarnissaa siunertaralugu kalaallit eqqumiitsuliaannik suliaqartitsisinnaapput (eqqumiitsuliat suliaakkiissutit).

*Imm. 2.* Naalakkersuisut aamma kommunalbestyrelsi inissap tamanit tikinneqartartup pinnersarnissaa siunertaralugu eqqumiitsulianik suliaqartitsinngikkaluarlutik suliniutinik allanik aallartitaqarsinnaapput, tamatumunnga ilanngullugit siunnersuusiortitsineq, isumassarsiortitsineq, unammisitsinerit aamma inissami tamanit tikinneqartartumi eqqumiitsulianut suliassatut pilersaarutaareersunut tapiissuteqarneq.

*Imm. 3.* Naalakkersuisut eqqumiitsuliat suliakkiissutit suliniutillu allat inissap tamanit tikinneqartartup pinnersarnissaanik siunertaqartut pillugit malittarisassanik aalajangersaasinnaapput, tamatumunnga ilanngullugit agguaassineq, piginnittuunermut tunngasut aserfallatsaaliinerlu.

**§ 11.** Naalakkersuisut eqqumiitsuliortut suliaat pisortanut suliffeqarfinnullu saqqummersitassatut atukkiunneqarsimatillugit taakkununnga akissarsiaqartitsinissaq pillugu malittarisassanik aalajangersaasinnaapput, tamatumunnga ilanngullugit suliat akissarsissutigineqarsinnaasut killilersornerat, akissarsiassat naatsorsornerat akissarsiallu tunniunneqarnerat.

#### **Kapitali 4**

##### *Eqqumiitsuliornermik ingerlatsinermut tapiinissamut tunngaviit*

**§ 12.** Naalakkersuisut eqqumiitsuliornermik ingerlatsinermut tapiissutaat sallerpaatillugu nuna tamakkerlugu aamma inuussutissarsiutigalugu eqqumiitsuliornermik ingerlatsinermut atorneqassapput.

*Imm. 2.* Kommunalbestyrelsip eqqumiitsuliornermik ingerlatsinermut tapiissutaat sallerpaatillugu najukkami eqqumiitsuliornermik ingerlatsinermut atorneqassapput.

**§ 13.** Naalakkersuisut aamma kommunalbestyrelsi eqqumiitsuliornermik ingerlatsinermut tapiisassapput eqqumiitsuliornekkut pitsaassutsip piginnaaneqassutsillu nalilerneqarnerat tunngavigalugu.

*Imm. 2.* Naalakkersuisut tapiissutinik tunniussinerminni aammattaaq sapinngisaq naapertorlugu makku ilaatinniassavaat:

- 1) eqqumiitsulioriaatsit § 1-imi taaneqartut iluanni eqqumiitsulioriaatsit saqqummeeriaatsillu tamaasa,
- 2) eqqumiitsuliornermik ingerlatsineq eqqumiitsulioriaatsinik arlalinnik akimuisoq,
- 3) eqqumiitsuliornermik ingerlatsineq meeqqanik inuusuttunillu peqataatitsisoq imaluunniit meeqqanut inuusuttunullu saaffiginnittoq, aamma
- 4) nunami tamarmi eqqumiitsuliornermik ingerlatsineq sumiiffinnut assigiinngitsunut siammaassisoq.

#### **Kapitali 5**

##### *Aningaasalersuineq allaffissornikkullu aqutsineq*

§ 14. Naalakkersuisut eqqumiitsuliornermik ingerlatsineranut tamatumalu saqqummiunneranut tapiissutaat aningaasanut inatsimmi tamatumunnga aningaasaliissutitut aalajangersarneqartut iluanni pisassapput.

§ 15. Naalakkersuisut eqqumiitsuliornermik ingerlatsineranut tamatumalu saqqummiunneranut tapiissutaannik allaffissornikkut aqutsineq Naalakkersuisut tamakkiisumik ilaannakortumilluunniit Namminersorlutik Oqartussat ataanni pisorta qarfinnut suliffeqarfinnulluunniit allanut isumagisassanngortissinnaavaat.

§ 16. Naalakkersuisut eqqumiitsuliornermik ingerlatsineranut tamatumalu saqqummiunneranut tapiissutaannik allaffissornikkut aqutsinermi suliasat tamakkiisumik ilaannakortumilluunniit isumaginissaannut siunnersuisartoqatigiinnik, ataatsimiititalianik assigisaannillu Naalakkersuisut pilersitsinnaapput.

*Imm. 2.* Naalakkersuisut siunnersuisartoqatigiit, ataatsimiititaliat assigisaasalu Naalakkersuisut eqqumiitsuliornermik ingerlatsineranut tamatumalu saqqummiunneranut atatillugu tamakkiisumik ilaannakortumilluunniit Naalakkersuisut tapiissutaannik allaffissornikkut aqutsisussat siunertaat, suliasaat, katitigaanerat suliasaallu pillugit malittarisassanik erseqqinnerusunik aalajangersaasinnaapput, tamatumunnga ilanngullugu allattoqarfittut suliasat.

*Imm. 3.* Naalakkersuisut siunnersuisartoqatigiit, ataatsimiititaliat assigisaasalu Naalakkersuisut eqqumiitsuliornermik ingerlatsineranut tamatumalu saqqummiunneranut atatillugu tamakkiisumik ilaannakortumilluunniit Naalakkersuisut tapiissutaannik allaffissornikkut aqutsisussat aammattaaq allanik suliasaminnut attuumassuteqartunik suliaqarnissaat pillugu malittarisassanik aalajangersaasinnaapput, tamatumunnga ilanngullugu eqqumiitsuliornermik ingerlatsineq pillugu apeqqutini siunnersuinissaq.

§ 17. Pisortat ingerlatsineranni suliasat suliarineqartarnerat pillugu Inatsisartut inatsisaanni aamma pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni aalajangersakkat siunnersuisartoqatigiinnut, ataatsimiititalianut assigisaannullu § 16-imi taaneqartunut atuutissapput, taakku Inatsisartut inatsisaat manna malittarisassallu taanna malillugu atuutinneqalersut naapertorlugit aalajangiisinnaatitaalersinneqarpata.

## **Kapitali 6**

### *Naatsorsuutit kukkunersuinerlu*

§ 18. Eqqumiitsuliornermik ingerlatsineranut saqqummiinermulluunniit taperneqartut, tapit siunertamut aningaasaliiffigineqartumut atorneqarsimanerat ilumoornerarlugu nalunaarutigissavaat, tamannalu pillugu qinnuigineqarunik uppernarsaasissallugu.

*Imm. 2.* Tapiissutit atorneqarsimanerat pillugu ilumoorneraalluni nalunaaruteqarnissaq uppernarsaasiinissarlu pillugit Naalakkersuisut malittarisassanik aalajangersaasinnaapput, taakkununnga ilanngullugit naatsorsuineq kukkunersuinerlu.

**§ 19.** Eqqumiitsuliornermik ingerlatsinermut saqqummiussinernullu tapiissuteqarnissamik ilimasaarut tunuartinneqarsinnaavoq, tapiissutillu tunniunneqartut tamakkiisumik ilaannakortumilluunniit uterteqquneqarsinnaallutik, qinnuteqartoq eqqunngitsunik paasissutissiisimappat, tapiinissamut piunasaqaatit piviusunngortinneqanngippata imaluunniit tapiissutit siunertamut aningaasaliiffiqineqartumit allaanerusumut atorneqarsimappata.

*Imm. 2.* Tapiissutit unitsinneqarneri utertinnissaallu pillugit Naalakkersuisut malittarisassanik aalajangersaasinnaapput.

## **Kapitali 7**

### *Maalaaruteqarneq*

**§ 20.** Inatsisartut inatsisaat manna naapertorlugu imaluunniit maleruagassani manna naapertorlugu aalajangersarneqartuni Naalakkersuisut Kommunalbestyrelsillu aalajangiineri allaffissornikkut oqartussaasumut allamut maalaarutigineqarsinnaanngillat.

*Imm. 2.* Siunnersuisartoqatigiit, ataatsimiititaliat assigisaasalu Naalakkersuisut eqqumiitsuliornermik ingerlatsinermut tamatumalu saqqummiunneranut tapiissutaannik allaffissornikkut aqutsinermi suliaassanik tamakkiisumik ilaannakortumilluunniit isumaginnittut, tak. § 16, aalajangiineri allaffissornikkut oqartussaasumut allamut maalaarutigineqarsinnaanngillat. Aalajangiinerit inatsisitigut sinaakkutaannut atatillugu maalaarutit Naalakkersuisunut saqqummiunneqarsinnaapput, aalajangiinerup ullulerneqarneraniit kingusinnerpaamik sapaatip-akunnerisa sisamat qaangiunnerani.

## **Kapitali 8**

### *Misileraalluni aaqqissuussinerit*

**§ 21.** Naalakkersuisut immikkut pisoqartillugu, utaqqiisaasumik aaqqiinertut, Inatsisartut inatsisaanni aalajangersakkat sanioqqussinnaavaat, Inatsisartut inatsisaata atuuffiani misileraalluni ingerlatsinissap siuarsarnissaanut pisariaqartutut isigineqartumik annertussusilimmik.

*Imm. 2.* Naalakkersuisut misileraalluni ingerlatsinerit, tak. imm. 1, tapiissuteqarsinnaapput.

## **Kapitali 9**

### *Nakkutilliineq*

**§ 22.** Naalakkersuisut kommunalbestyrelsit inatsimmik ingerlatsinerat nakkutigissavaat.

*Imm. 2.* Naalakkersuisut paasissutissanik inatsit naapertorlugu suliaassamik sularinninissaannut pisariaqartutut isigineqartunik kommunalbestyrelsit piunaffigisinnaavaat.

**Kapitali 10**  
*Atuutilerpera*

§ 23. Inatsisartut inatsisaat atuutilerpoq 1. januar 2016.

*Namminersorlutik Oqartussat, xx.xx 2015*

Kim Kielsen